



JUDICIAL SYSTEM MONITORING PROGRAMME

PROGRAMA DE MONITORIZAÇÃO DO SISTEMA JUDICIAL

Komunikadu Imprensa

Periodu : Agostu 2010

Edisaun : 31 de Agostu 2010

JSMP Hala'ó Workshop Konabá Prosesu Lejislativu iha Suku Taiboco Distritu Oecusse

Judicial System Monitoring Programme (JSMP) liu husi unidade Programa Observasaun Parlamentu (POP) iha Quinta 26 Agostu 2010 liu bá, hala'ó workshop konabá prosesu lejislativu iha Suco Taiboco, Sub Distritu Pante Makasar Distritu Oe-Cusse. Workshop konta ho partispantes husi comunidade hamutuk nain 30.

Objetivu husi workshop ne'e atu aumenta comunidade iha área rurál sira nia koñesementu konabá prosesu lejislativu en jeral, no kna'ar ou servisu husi orgaun soberania Parlamentu Nasionál nian nu'udar representante povu iha uma fukun.

Luis de Oliveira Sampaio, Direitór JSMP deklara katak presija duni atu comunidade iha área rurais, koñese no hatene diak liu tan oinsá prosesu halo lei nian, tanbá lei ne importante tebes bá povu Timór Léste tomak inklui comunidade iha área rurais. Nune'é mós importante atu hakle'an koñesementu povu nian, konabá kna'ar ou servisu Parlamentu Nasionál nian tanbá membrus Parlamentu Nasionál mak representante povu iha uma fukun. Aliende ne'e comunidade iha area rurais mós presija hatene, oinsá sira nia partispasaun iha prosesu lejislativu ou halo lei nian, no oinsá sira bele asesu bá Parlamentu Nasionál no nia membrus sira.

Bazeia ba esperensia JSMP nian, maioria comunidade rural la hatene oinsá prosesu halo lei nian, no sira mós la hatene kna'ar ou servisu husi membrus Parlamentu Nasionál nian. Tanbá ne'e partispantes sira dala bákak hateten katak Parlamentu Nasionál no Governu ne'e, orgaun rua ne'ebé mak nia servisu hanesan. Partispantes sira mos iha konfuzsaun konabá knar hosi Ministériu Justisa no Tribunal nian. Ho razaun hirak ne'e JSMP hanoin katak, sosiedade sivil hotu bele ajuda governu atu halo edukasaun sívika liu husi workshop ka terinamentu bá comunidade sira iha área rural. Prosesu ne'e, atu ajuda povu sira iha area rural bele akompañia no iha koñesementu naton ba prosesu no atividade parlamentar nian inklui prosesu ba halo lei nian, fiskalizasaun ba atividade governu nian, no hola desizaun politiku ruma ba interese nasaun nian. JSMP hanoin katak prosesu ne'e ho intensaun atu involve povu hodi halo observasaun ou monitorizasaun adekua no direta ba bá kna'ar ou membrus Parlamentu Nasionál nian. Esforsu hirak ne'e atu nune'é prosesu demokrasia bele sai buras liu tan.

Liu husi workshop ida ne'e partisipantes sira ho laran kontente haktuir katak sira kompriende liu tan konabá kna'ar ou servisu husi membrus Parlamentu Nasionál nian, tanbá durante ne'e hatene deit Parlamentu no Deputadu maibé la hatene konabá sira nia servisu. Iha okaziaun ne'e mós, partisipantes sira ne'e fó rekomendasaun ba JSMP atu hatoo bá membrus Parlamentu Nasionál sira katak, aliende fiskaliza servisu Governu nian, persija mós halo fiskalizaun bá povu nia situasaun real iha área rural inklui suku Taiboco, atu nune'é bele haré ho matan oinsá povu nia terus iha área ne'ebá. Liután, partisipantes sira mós afirma katak membrus Parlamentu Nasionál la bele hakbesik aan deit bá povu wainhira iha tempu kampaña bá elisaun nian, no liu tiha ida ne'e haluha tiha sira nia difikuldade.

Atu hetan infórmasaun kle'an favor kontaktu:

Luis de Oliveira Sampaio

Direitor Ezekutivu JSMP

Diresaun e-mail: luis@jsmp.minihub.org

Landline: 3323883